

Акафист блаженному Василию, Христа ради юродивому, Московскому чудотворцу

Кондак 1

Избранный сосуд Божией благодати, миром добродетелей преисполненный, достоугодне Василие, яко избавляеми от всяких бед и напастей твоим о нас ко Господу теплым предстательством, благодарственное сие тебе пение приносяще зовем: Радуйся, преблаженне Василие, юроде богомудре, московский чудотворче.

Икос 1

Ангелоподобно житие твое бысть богоблаженне и чистота воистину нескверна: ведый бо, яко любви мира сего вражда Богу есть, не восхотел еси друг миру быти, но предал еси всего себе Богу, таковому величию подвига твоего дивящися вопием: Радуйся, верный Господа служителю, лоза предивная Христова винограда; Радуйся, жития добродетельнаго учителю, овча избранное Господня стада. Радуйся, лона Авраама насельниче, рая пресладостнаго житель; Радуйся, царствия небеснаго наследниче, тамо себе восприявый обитель. Радуйся, преблаженне Василие, юроде богомудре, московский чудотворче.

Кондак 2

Виде, яко вся яже в мире: похоть плоти, похоть очес и гордость житейская, учил еси, преблаженне, презирати плоть, переходит бо: прилежати же о души бессмертной, воспевая непрестанно Богу: Аллилуиа.

Икос 2

Разум неуразуменен, труды и подвиги твоя, достоблаженне Василие, имиже седьдесят и два лета во граде сем Москве, плоть твою удручал еси. Мы же, многострадальным терпением твоим умиляеми, зовем: Радуйся, преугодный ангеле земный, земная в сердце вся поправый; Радуйся, предивный человеке небесный, небеснаго отечества взыскавый. Радуйся, огнезрачный херувиме, в душе своей вся страсти поपालивый; Радуйся, преблаженне Василие, юроде богомудре, московский чудотворче.

Кондак 3

Силою благодати от Бога свыше укрепляем, желанием к небесному возгорелся еси, всеблаженне, и чистотою жития твоего обителей вечных достигл еси, в них ныне вопиеша Богу: Аллилуиа.

Икос 3

Имеяй в сердце слово Господне: кая бо польза человеку, аще приобрящет мир весь, и отщтит душу свою; вся красная мира сего во уметы вменил еси, темже прославляюще тя, зовем: Радуйся, в мире сем вне мира живой, и славу всю его презревый; Радуйся, во плоти аки безплотен бывый, небесныя славы восхотевый. Радуйся, душу свою возлюбивый, спасения вечнаго искавый; Радуйся, тело свое яко врага смиривый, путь подвига избравый. Радуйся, преблаженне Василие, юроде богомудре, московский чудотворче.

Кондак 4

Бурю велию злобы многомятежный диавол воздвиже на тя, богоблаженне Василие, ты же убежал еси ловления лъстиваго сего миродержца, и увязлся еси венцем нетления, воспевая Богу: Аллилуиа.

Икос 4

Слыша Христову заповедь: ищите прежде всего Царствия Божия и правды его, отгаси еси всякое мирское пристрастие. Восхваляюще такуюю о Бозе ревность твою, вопием: Радуйся, от юности дом отеческий оставивый и сродники своя и други вся покинувый; Радуйся, к дому отца небеснаго стопы своя направивый, широкий путь сластей отринувый. Радуйся, неясноты пустынной уподобивыйся, крова себе на земли не имевый; Радуйся, обителей райских сподобивыйся, пристанище благоотинное тамо обревый. Радуйся, преблаженне Василие, юроде богомудре, московский чудотворче.

Кондак 5

Боготечной звезде, светозарный путь спасения показующей, уподобился, блаженне, нас, во тме греховней блуждающих, на путь правый настави, да спасеннии тобою, воспоем Богу: Аллилуиа.

Икос 5

Видя злохитрство диавола, ищуща житейскими попеченьми одержимых в сети своя уловляти, противустал еси кознем вражиим, ни о чем же земным печевся. Видяще сицевое твое благое произволение, зовем ти: Радуйся, всего себе измлада Господу вручивый и к тому

единому направивый весь твой слух; Радуйся, того единого всем сердцем возлюбивый, и того единого смиренный раб и верный друг. Радуйся, стезею подвига все житие свое прошедший, и добродетелию своею сонмы ангелов удививый; Радуйся, небесный бисер многоценный на земли обретший, чистотою твоею лик праведных возвеселивый. Радуйся, преблаженне Василие, юроде богомудре, московский чудотворче.

Кондак 6

Проповедуя паче всякаго слова житием твоим не любити мира, ни яже в мире, добродетелей куплю многу стяжал еси и Владыце Христу яко всеплодие жертвенное принесл еси, вопия Ему: Аллилуиа.

Икос 6

Возсия, яко светило лучезарное, подвиги твоя, всеблаженне, ревностию духовною разгоревся, ко множайшему труду простерл еси себе: Адаму первозданному подобяся, наг на земли ходил еси, плоть свою удручая. Таковую крепость души твоя восхваляюще, зовем: Радуйся, одеяний тленных совлекшийся, тело свое нагоде предавый; Радуйся, безстрастием святым облекшийся, добродетели ризу светлую избравый. Радуйся, мраза лютаго не убоавшийся, теплоты райския искавый; Радуйся, зноя солнечнаго не уклонивыйся, прохладения небеснаго желавый. Радуйся, преблаженне Василие, юроде богомудре, московский чудотворче.

Кондак 7

Хотяй мудрости небесныя сподобитися, последовал еси гласу Павла апостола: аще кто мнится мудр быти в веще сем, юрод да бывает, да премудр будет, и Христа ради юрод был, яко безумна являя себя миру, умудрившему же тя Господу воспевая: Аллилуиа.

Икос 7

Дивно и пречудно юродство твое бысть, преблаженне, всякое нечестие и беззаконие небаянно обличал еси, многия досаждения и раны за то претерпевая. Таковой великий подвиг твой ублажая, зовем ти: Радуйся, ум земной отринувый, небесный разум восприявый; Радуйся, земную мудрость всю покинувый, юродства подвиги себе избравый. Радуйся, диавола своим юродством прехитривый и льстивых сетей его избежавый; Радуйся, безумна миру себе явивый, мудрых века сего всех поправый. Радуйся, преблаженне Василие, юроде богомудре, московский чудотворче.

Кондак 8

Странник и пришелец был еси, преблаженне Василие, небеснаго града Иерусалима взыскупа, егоже достигл еси, и ныне воспеваеши тамо Богу немолчно: Аллилуиа.

Икос 8

Весь к Богу вперив твой ум, и возлюби небесная, земное все отрясл еси, темже нас ныне земли приверженных к небесному обрати, да избавльшися от земнаго пристрастия и суеты мирския, благодарственно возопиим ти: Радуйся, телом на земли пребывавый, но земная вся презревый; Радуйся, духом же на небе обитавай. Радуйся, дивный Божий угодниче, житием своим, яко солнце, сияющий; Радуйся, многотерпеливый Христов подвижниче, и нас к подвигам призывающий. Радуйся, преблаженне Василие, юроде богомудре, московский чудотворче.

Кондак 9

Вся чинове ангельстии с небес на землю мысленными приникше очима и видяще твоя подвиги, во умилении воспеваху Богу: Аллилуиа.

Икос 9

Витийствовати хотящий язык наш безгласием связуется, яко не могущий по достоянию восхвалити добродетели твоя. Не презри нас, зовущих ти: Радуйся, рососою благодати душу свою напоивый и семена благие измлада в ней насадивый; Радуйся, плоды спасительныя в сердце своем возрадивый подвигами своими, яко камением многоценным, себе украсивый. Радуйся, крине райский, добродетелями благоухающий и сердце наше услаждающий; Радуйся, светильник пресветлый во тьме греховней сияющий, нас же светом благоразумия просвещающий. Радуйся, преблаженне Василие, юроде богомудре, московский чудотворче.

Кондак 10

Спасти хотяй от бури в море потопляемых и к тебе о спасении своем возопивших, явился еси им на мори, во граде Москве неотступно пребывая, и от потопления избавил еси, да восхваляют Бога, чудесне тобою их спасшего, и возопиют ему: Аллилуиа.

Икос 10

Господа Бога непрестанно умом зря, не дал еси очима своима сна, ни веждама - дремания, в молитве церковней нощи пребывая. Людие же видяще таковое твое к Богу усердие, взываху ти: Радуйся, высотой смирения твоего умы наша удивляющий, глубиною смирения сердца наша умиляющий; Радуйся, душу свою храмину духа святого сотворивый и страстем вход в ню заградивый. Радуйся, креста Господня носитель терпеливый, всем сердцем его взыскавый; Радуйся, иго Господне яко благое возлюбивый, бремя легкое его радостно подъявый. Радуйся, преблаженне Василие, юроде богомудре, московский чудотворче.

Кондак 11

Пение всеумиленное тебе, всеблаженне, приносяще, вопием: якоже древле чудодействуя, расслабленных исцелял еси, слепым прозрение даровал еси, тако и ныне души наша, грехами расслабленные и похотью ослепленные, исцели, да вопием Богу: Аллилуиа.

Икос 11

Светоподательна светильника великаго зрим тебе, преблаженне Василие, наставляюща на путь правый блуждающих во тьме и сени смертной. Того ради вопием ти: Радуйся, лучу правды Христовой пособствующий, мглу помыслов суетных разгоняющий; Радуйся, заре истины евангельския, тьму страстей освещающая и объятых ею от гибели вечныя спасающая. Радуйся, уголь божественный, похоти наша опаляющий, лукавыя козни бесовския потребляющий; Радуйся, пламень небесный, хладныя сердца наша возгревающий, умы же светом Божественным озаряющий. Радуйся, преблаженне Василие, юроде богомудре, московский чудотворче.

Кондак 12

Благодатию Божию просвещаемый, богоблаженне Василие, просвети наш ум и очисти наше сердце, да сподобимся и мы воспевати с тобою купно Богу: Аллилуиа.

Икос 12

Поющих твоя подвиги, восхваляющих твоя злострадания, прославляющих твое юродство, дивящихся твоим добродетелем не остави своим ходатайством пред Господом, да воспоем ти: Радуйся, непрестанный о нас Богу молитвенниче, милость Божию на нас призывающий; Радуйся, крепкий наш защитниче, от бед и скорбей нас охраняющий. Радуйся, нападствуемых скорый избавителю, на путь

спасения наставляющий; Радуйся, граду нашему Москве всегдашний покровителю, помощь свою всем чтущим тя присно являющий. Радуйся, преблаженне Василие, юроде богомудре, московский чудотворче.

Кондак 13

О преблаженне и достоугодне Василие, малое сие похваление от нас яко плод благодарения приими, яко глас прошения услыши, да избавимся твоими о нас Богу молитвами от обышедших зол и напастей, и возопием Богу, Спасителю нашему: Аллилуиа.

(Этот кондак читается трижды, затем икос 1 и кондак 1)